



XUNTA DE GALICIA

VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Secretaría Xeral Técnica

Edif. Advo. San Caetano, s/n
15781 Santiago de Compostela
Tlf.: 981 544 513 Fax: 981 544 601



DILIXENCIA DE CONSTANCIA

Esténdoa eu, Ángeles Lestón Mayo, xefa do Servizo Técnico Xurídico, para facer constar que a memoria que segue, que leva por título *Memoria xustificativa do convenio de colaboración entre a Vicepresidencia e Consellería de Presidencia, Administracións públicas e Xustiza e a Federación Galega de Municipios e Provincias (FEGAMP) para a coordinación de actuacións no desenvolvemento do programa galego de vixilancia e control fronte á avespa asiática (vespa velutina)*, é unha imaxe obtida mediante o escaneamento íntegro da memoria orixinal, que foi asinada de forma manuscrita o 14 de xaneiro de 2020.

E para que produza efectos cara a súa inscrición no Rexistro de Convenios do Sector Autonómico de Galicia, asino electronicamente a presente dilixencia.



Xacobeo 2021





XUNTA DE GALICIA

VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Dirección Xeral de Administración Local

Rúa Madrid, 2-4
15781 - SANTIAGO DE COMPOSTELA
Teléfonos 981 546 579 – 981 546 220
Fax: 981 546 569
E-mail: administracionlocal@xunta.es



CONVENIO ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E A FEDERACIÓN GALEGA DE MUNICIPIOS E PROVINCIAS (FEGAMP) PARA A COORDINACIÓN DE ACTUACIÓNS NO DESENVOLVEMENTO DO PROGRAMA GALEGO DE VIXILANCIA E CONTROL FRONTE Á AVESPA ASIÁTICA (VESPA VELUTINA)

MEMORIA XUSTIFICATIVA

A Xunta de Galicia con motivo da problemática xerada polo avance da avespa asiática na Comunidade Autónoma, puxo en marcha un Protocolo de vixilancia e control fronte a esta especie no ano 2014 co fin de minimizar a incidencia que ao respecto ten esta especie sobre as producións apícolas e sobre a seguridade cidadá. Este Protocolo recolle as actuacións necesarias que permitan a contención e seguimento desta especie, tendo en conta que este insecto afecta principalmente á produción apícola e tamén ten repercusións sobre a biodiversidade e a seguridade cidadá. Este programa inclúe fundamentalmente actividades relacionadas coa detección precoz de niños mediante avisos a través do 012 e 112 e o control e eliminación/neutralización de niños sempre que sexa posible.

Ata o momento, as actuacións para a retirada dos niños de vespa velutina foron realizadas, dependendo das zonas, polos concellos colaboradores directamente, pola Consellería de Medio Ambiente, Territorio e Vivenda e pola Consellería do Medio Rural.

Co fin de redobrar esforzos e concentrar os recursos, ofrecendo unha actuación profesional e eficaz, a Xunta de Galicia e a Fegamp acordan poñer en marcha de forma coordinada e conxunta no ano 2020 un programa para a retirada e eliminación dos niños da vespa velutina en todo o territorio galego. Este programa suporá unha coordinación por parte da Xunta de Galicia nos labores de retirada e extinción de niños de vespa velutina cos concellos que se adhiran a este.

Para concretar de forma precisa o ámbito territorial de actuación na execución deste programa polo que a Xunta de Galicia coordinará coas entidades locais, as actuacións necesarias para a eliminación de niños de vespa velutina, a Dirección Xeral de Administración local instou no mes de decembro de 2019 aos 313 concellos para que comunicasen coa maior brevidade posible o seu interese en acollerse a este. No anexo I do convenio, relaciónanse os 277 concellos que amosaron expresamente a súa conformidade a esta coordinación por parte da Xunta de Galicia e respecto dos que actuará desde a sinatura do convenio sen prexuízo de que no prazo máximo de 15 días estes formalicen a súa adhesión coa sinatura do anexo II. Ademais os demais concellos poderán en adherirse expresamente asinando o Anexo II. A adhesión implica para os concellos a asunción das obrigas establecidas na disposición oitava.



Xacobeo 2021





Por iso, a Xunta de Galicia propón a sinatura do CONVENIO ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓNS PÚBLICAS E XUSTIZA E A FEDERACIÓN GALEGA DE MUNICIPIOS E PROVINCIAS (FEGAMP) PARA A COORDINACIÓN DE ACTUACIÓNS NO DESENVOLVEMENTO DO PROGRAMA GALEGO DE VIXILANCIA E CONTROL FRONTE Á AVESPA ASIÁTICA (VESPA VELUTINA) no que se establecen, entre outras cousas, as cláusulas que rexerán esta actuación na que participan e se coordinan a administración autonómica e local.

Entre as competencias que, no relativo ás relacións coas entidades locais galegas, corresponden á Xunta de Galicia, de acordo co disposto nos artigos 194 e 195 da Lei 5/1997, do 22 de xullo, de Administración local de Galicia, está a de cooperación e colaboración, podéndose levar a cabo mediante a subscrición de convenios.

De conformidade co artigo 1 do Decreto 233/2012, do 5 de decembro, a Vicepresidencia da Xunta de Galicia, configúrase tamén como un órgano superior de coordinación da Presidencia da Xunta de Galicia ao que lle corresponden, entre outras, as funcións de coordinación e planificación interdepartamental e a súa execución, así como asegurar e garantir as necesarias relacións coas administracións locais.

Así mesmo, a Vicepresidencia e Consellería de Presidencia, Administracións Públicas e Xustiza conforme ao disposto no Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia e o Decreto 74/2018, do 5 de xullo, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, é o departamento encargado de xestionar as competencias e funcións en materia de elaboración, proposta e execución da política do Goberno en materia de Administración Local e de emerxencias e interior que ten atribuídas a Comunidade Autónoma de Galicia.

Polo que se refire á Federación Galega de Municipios e Provincias, cómpre dicir que ten, entre os seus fins, promover, representar e defender os intereses das Entidades Locais ante outras Administracións Públicas, conforme ao disposto no artigo 6.1 letra b) dos seus Estatutos. Con esta finalidade goza de plena capacidade para subscribir convenios e contraer compromisos e obrigas segundo o artigo 8 dos seus Estatutos. A disposición transitoria terceira da Lei 5/1997, de Administración Local de Galicia, establece que a Fegamp, recoñecida polas entidades locais como a entidade asociativa máis representativa e maioritaria, terá as facultades derivadas da súa representatividade.

Ademais, de conformidade co artigo 23 do Decreto 56/2000, do 3 de marzo, polo que se aproban as medidas de coordinación da protección civil no ámbito da Comunidade Autónoma de Galicia (DOG núm. 62, do 29 de marzo de 2000), a Xunta de Galicia poderá establecer acordos, convenios e protocolos de colaboración e cooperación cos entes que integran a Administración local de Galicia para unha mellor e máis efectiva





coordinación interadministrativa, tanto na fase preventiva coma na operativa, colaborando coa dotación de medios e recursos necesarios.

Os artigos 25 e 26.1 da Lei 7/1985, de 2 de abril, reguladora das bases do réxime local e os artigos 80 e 81 da Lei 5/1997, de 22 de xullo, de Administración Local de Galicia, recollen que os municipios deberán prestar á súa cidadanía os servizos públicos que contribúan a satisfacer as necesidades e aspiracións da comunidade de vecinos, entre os que se atopan a seguridade en lugares públicos e a protección civil e extinción de incendios, polo que teñen necesidade de contar con medios para poder facer fronte as súas competencias, compartidas e concorrentes, en materia de protección civil e emerxencias.

Nesta mesma liña, a Lei 5/2007, do 7 de maio, de emerxencias de Galicia no seu artigo 1.2 define a protección civil como *“un servizo público esencial organizado nun sistema integrado de actuación para lles facer fronte aos riscos ordinarios e a riscos graves coa participación das distintas administracións públicas, baixo a coordinación e a dirección da Xunta de Galicia e coa colaboración cidadá.”* E coa mesma consideración, a Constitución española, o Estatuto de autonomía de Galicia e a Lei 17/2015, de 9 de xullo, do Sistema Nacional de Protección Civil coinciden no carácter de servizo público esencial deste servizo.

Este convenio ten por obxecto establecer o marco para executar de xeito coordinado a posta en marcha do programa galego de vixilancia e control fronte á avésa asiática (Vespa Velutina) en 2020 entre a Xunta de Galicia e os concellos que se adhiran, e establece o marco xurídico xeral polo que se rexerán as relacións entre a administración autonómica que coordinará a execución do programa e os concellos que se adhiran que asumirán o compromiso de facilitar a execución do programa facilitando cos seus propios medios os labores de retirada de niños e promovendo a información sobre o programa en sí aos veciños. Tamén a Fegamp adquire a obriga de difundir entre os concellos de Galicia calquera información relativa ao programa de vixilancia e control da vespa velutina. Ademais, dous representantes da Fegamp formarán parte da comisión de seguimento do convenio, xunto con dous representantes da Xunta de Galicia.

A súa duración comprenderá desde a data da súa sinatura e ata o 15 de decembro, sen prexuízo de prorrogar a súa vixencia nos termos en que se determinen antes da finalización do correspondente período de vixencia.

Este convenio axústase á normativa vixente, e os intereses converxentes das partes asinantes do convenio exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, de 8 de novembro, de Contratos do Sector Público, ou doutro instrumento alleo á natureza estritamente convencional.





XUNTA DE GALICIA

VICEPRESIDENCIA E CONSELLERÍA DE PRESIDENCIA,
ADMINISTRACIÓNS PÚBLICAS E XUSTIZA
Dirección Xeral de Administración Local

galicia

Polo exposto e co fin de dar cumprimento ao disposto no artigo 15.2 da Lei 1/2016, de 18 de xaneiro, de transparencia e bo goberno, estimouse xustificada a sinatura do instrumento convencional, con exclusión doutras figuras.

Santiago de Compostela, 14 de xaneiro de 2020

A directora Xeral de Administración Local

Marta Fernández-Tapias Núñez



Xacobeo 2021

